

EKO I ETNO TURIZAM

U Bosni i Hercegovini postoji dosta izoliranih, ali veoma gostoljubljivih zajednica u selima. Optimalna nadmorska visina, guste šume, livade, vodotoci sa jezerima i ponorima, pećine, stijenski masivi i veoma kvalitetan zrak u našim selima pružaju turistima izuzetne uslove za izlete, lov, ribolov, planinarenje, alpinizam, speleologiju, skijanje, branje gljiva i ljekovitih trava. Selo Lukomir se nalazi 50 km jugozapadno od Sarajeva na 1495 m n.v. na Bjelašnici, što ga čini najvišim naseljenim mjestom u Bosni i Hercegovini, gdje možete upoznati desetak seljana koji žive u kamenim kućama. Tokom duge i oštre zime od početka novembra do kraja aprila seljani su izolovani od ostatka svijeta jer snijeg zatrpava puteve, a jedini prilaz Lukomiru je neprohodan. Pored Lukomira i brojnih drugih seoskih područja koji nude očuvan prirodni ambijent i zdravu ishranu, u Bosni i Hercegovini je razvijen eko i etno turizam sa brojnim turističkim centrima koji nude jedinstven ambijent i turističku ponudu.

Etno Begovo selo je smješteno u zaštićenoj zoni prirodnog rezervata Bijambare i nudi usluge odmora i rekreacije. Nadmorska visina je 1040 m i udaljeno je 500 m od magistralnog puta Sarajevo – Tuzla. Etno Begovo selo, pored bosanske kuhinje nudi i jahanje, iznajmljivanje bicikala, foto safari, rafting na Krivaji, jogu, masažu, kao i mogućnost posjete Bijambarskim pećinama.

Etno - selo Herceg je smješteno na tromeđi Čitluka, Međugorja i Ljubuškog. Pored hotelsko – turističkog centra izgrađenog 2008. godine, postoji zaselak od 10 kamenih kuća gdje se nalaze i trgovine koje nude tradicionalne proizvode. Unutar sela nalazi se i muzej. Pored eko i etno turističke ponude i sportskih sadržaja, etno – selo Herceg nudi i usluge kongresnog turizma.

Kraljevsko selo Kotromanićevo nalazi se u dobojskoj regiji, 45 km od granice sa Hrvatskom, na obali rijeke Veličanke i nudi boravak u savremeno opremljenim kućama građenim u starinskom stilu od prirodnih materijala – drvenim brvnarama. Pored šetnji nedirnutoj prirodom, Kraljevsko selo Kotromanićevo organizuje viteške turnire, srednjovjekovne večere, lov, ribolov, paragliding i planinski biciklizam.

Etno-selo Stanišići u blizini Bijeljine obuhvata turistički kompleks sa ribnjacima, vodenicama, konjušnicom i štalama koje su pretvorene u ekskluzivni smještaj sa luksuzno opremljenim apartmanima. U etno selu se nalazi i Manastir Svetog Nikolaja u kojem se organizuju vjenčanja. U restoranu u etno selu Stanišići možete uživati u dobroj bosanskoj kuhinji i gostoprimstvu domaćina. Turistički kompleks nudi i školu jahanja, vožnju kočijama i sankama, kao i usluge kongresnog turizma.